

МОНГОЛ УЛСЫН ЗАСГИЙН ГАЗРЫН ТОГТООЛ

2016 оны 10 дугаар
сарын 5-ны өдөр

Улаанбаатар хот

Дугаар 111

“БОЛОВСРОЛЫН ЗЭЭЛИЙН САН” БАЙГУУЛАХ ТАЛААР АВАХ АРГА ХЭМЖЭЭНИЙ ТУХАЙ

Засгийн газрын тусгай сангийн тухай хуулийн 5.4.13, 6.4.6, 16.4, Дээд боловсролын санхүүжилт, суралцагчдын нийгмийн баталгааны тухай хуулийн 9.3-т заасныг тус тус үндэслэн Монгол Улсын Засгийн газраас ТОГТООХ нь:

1. Сургалтын төрийн санг “Боловсролын зээлийн сан” болгон өөрчлөн зохион байгуулж, орон тооны хязгаар, цалингийн санг баталж мөрдүүлэхийг Боловсрол, соёл, шинжлэх ухаан, спортын сайд Ж.Батсуурь, Сангийн сайд Б.Чойжилсүрэн нарт тус тус даалгасугай.

2. “Боловсролын зээлийн сангийн дүрэм”-ийг 1 дүгээр хавсралт, “Боловсролын зээлийн сангийн удирдах зөвлөлийн бүрэлдэхүүн”-ийг 2 дугаар хавсралт, ~~“Оюутны хөгжлийн зээлийн журам”-ыг 3 дугаар хавсралт ёсоор тус тус баталсугай.~~ /Энэ тогтоолын 3 дугаар хавсралтыг Засгийн газрын 2017 оны 176 дугаар тогтоолоор хүчингүй болсонд тооцсон. Мөн тогтоолын 1 дүгээр хавсралтад Засгийн газрын 2018 оны 46 дугаар тогтоолоор өөрчлөлт орсон/

3. Засгийн газрын 2014 оны 71 дүгээр тогтоолоор баталсан “Дээд боловсролын сургалтын байгууллагад суралцагчид суралцагчийн тэтгэлэг олгох журам”-д дор дурдсан агуулга бүхий 4.1.6 дахь заалт нэмсүгэй:

“4.1.6. Нэг өрхийн 3 болон түүнээс дээш хүүхэд дээд боловсролын сургалтын байгууллагад бакалаврын зэргийн боловсрол эзэмшихээр зэрэг суралцаж байгаа тохиолдолд 1 хүүхдийн.”

4. Энэ тогтоолын хэрэгжилтэд хяналт тавьж ажиллахыг Боловсрол, соёл, шинжлэх ухаан, спортын сайд Ж.Батсуурь, Сангийн сайд Б.Чойжилсүрэн нарт тус тус даалгасугай.

5. Энэ тогтоол гарсантай холбогдуулан “Журам батлах тухай” Засгийн газрын 2012 оны 1 дүгээр сарын 18-ны өдрийн 19 дүгээр тогтоолын 1, 2 дугаар хавсралт, 4 дүгээр хавсралтын 2 дугаар заалтыг хүчингүй болсонд тооцож, Засгийн газрын 2014 оны 71 дүгээр тогтоолоор баталсан “Дээд боловсролын сургалтын байгууллагад суралцагчид суралцагчийн тэтгэлэг олгох журам”-ын 4.4, 6.1, 6.2, 6.5, 6.6.2, 6.6.3 дахь заалтын “Сургалтын төрийн” гэснийг “Боловсролын зээлийн” гэж тус тус өөрчилсүгэй.

Монгол Улсын Ерөнхий сайд

Ж.ЭРДЭНЭБАТ

Боловсрол, соёл, шинжлэх

ухаан, спортын сайд

Ж.БАТСУУРЬ

Засгийн газрын 2016 оны 111 дүгээр
тогтоолын 1 дүгээр хавсралт

БОЛОВСРОЛЫН ЗЭЭЛИЙН САНГИЙН ДҮРЭМ

Нэг. Нийтлэг үндэслэл

1.1. Боловсролын зээлийн сан (цаашид “сан” гэх)-гийн зорилго нь дээд боловсролын сургалтын байгууллагад суралцагчид зохих журмын дагуу санхүүгийн дэмжлэг, суралцагчийн тэтгэлэг, сургалтын төлбөрийн зээл олгох, зээлийг эргэн төлүүлэх ажлыг зохион байгуулахад оршино.

1.2. Сангийн үйл ажиллагааг Засгийн газрын тусгай сангийн тухай хууль, Дээд боловсролын санхүүжилт, суралцагчдын нийгмийн баталгааны тухай хууль болон энэхүү дүрмээр зохицуулна.

1.3. Сангийн үйл ажиллагааны зардлыг улсын төсвөөс санхүүжүүлнэ. /Энэ заалтад ЗГ-ын 2018 оны 46-р тогтоолоор өөрчлөлт орсон бөгөөд үүнийг 2018-5-1-ний өдрөөс эхлэн дагаж мөрдөнө/

1.4. Сан нь тогтоосон журмын дагуу хийсэн тэмдэг, албан бичгийн хэвлэмэл хуудас хэрэглэнэ.

1.5. Сангийн хөрөнгийг Төрийн сангийн тусгай дансанд байршуулах бөгөөд банкинд харилцах данстай байна.

Хоёр. Сангийн Удирдах зөвлөл

2.1. Сангийн үйл ажиллагааг Удирдах зөвлөл (цаашид “Зөвлөл” гэх) удирдана. Зөвлөлийн бүрэлдэхүүнийг Засгийн газар батална.

2.2. Зөвлөлийн үйл ажиллагааны хэлбэр нь хуралдаан байна.

2.3. Зөвлөл нь улиралд нэгээс доошгүй удаа хуралдана. Шаардлагатай тохиолдолд зөвлөлийн саналаар ээлжит бус хуралдааныг зарлан хуралдуулж болно.

2.4. Нийт гишүүдийн 75-аас доошгүй хувь оролцсоноор хуралдааныг хүчинтэйд тооцно.

2.5. Зөвлөл асуудлыг тухайн хуралдаанд оролцсон гишүүдийн 75-аас дээш хувийн саналаар шийдвэрлэж, тогтоол, тэмдэглэл гаргана. Хүндэтгэн үзэх шалтгааны улмаас хуралдаанд оролцох боломжгүй гишүүн саналаа бичгээр өгсөн тохиолдолд түүнийг хуралдаанд оролцсонд тооцно.

2.6. Зөвлөлийн нарийн бичгийн дарга хэлэлцэх асуудлыг зөвлөлийн гишүүдэд 3 хоногийн өмнө бичгээр хүргүүлнэ.

2.7. Зөвлөл дараах эрх, үүрэгтэй байна:

2.7.1. сангийн үйл ажиллагааг удирдан зохицуулах;

2.7.2. сангийн үйл ажиллагааны болон сангийн хөрөнгөөр санхүүжүүлэх арга хэмжээний жилийн төлөвлөгөө, төсвийг хэлэлцэн батлах;

2.7.3. сангийн хөрөнгийн зарцуулалтад хяналт тавих, илэрсэн зөрчил, дутагдлыг арилгах талаар үүрэг даалгавар өгөх;

2.7.4. сангийн үйл ажиллагааны болон санхүүгийн тайланг хэлэлцэн дүгнэлт өгөх;

2.7.5. сангаас олгосон зээлийг эргэн төлүүлэх асуудлыг шийдвэрлэх.

Гурав. Сангийн гүйцэтгэх захирал

3.1. Сангийн гүйцэтгэх захирал нь тус сангийн үйл ажиллагааг өдөр тутмын удирдлагаар хангаж, Зөвлөлийн хуралдаанаас гарсан шийдвэрийн хэрэгжилтийг зохион байгуулах үйл ажиллагааг хариуцана.

3.2. Гүйцэтгэх захирлыг боловсролын асуудал эрхэлсэн Засгийн газрын гишүүн томилж, чөлөөлнө.

3.3. Гүйцэтгэх захирал нь Сангийн хөрөнгийг зориулалтын дагуу хуваарилах, зарцуулах, хөрөнгийн ашиглалтад хяналт тавих, тайлагнах ажлыг зохион байгуулах, сангийн ажилтнуудтай хөдөлмөрийн гэрээ байгуулж дүгнэх, тэдгээрийн ажил, үүргийн хуваарийг батлах чиг үүргийг хэрэгжүүлнэ.

3.4. Сангийн ажлын албаны бүтэц, орон тоог боловсролын болон санхүү, төсвийн асуудал эрхэлсэн Засгийн газрын гишүүн хамтран батална.

Дөрөв. Сангийн хөрөнгийн эх үүсвэр, зарцуулалт

4.1. Сангийн хөрөнгө нь дараах эх үүсвэрээс бүрдэнэ:

4.1.1. улсын төсвийн хөрөнгө;

4.1.2. эргэн төлөгдсөн зээлийн төлбөр, зээлийн хүүгийн өрлөг; /Энэ заалтад ЗГ-ын 2017 оны 46-р тогтоолоор өөрчлөлт орсон бөгөөд үүнийг 2018-5-1-ний өдрөөс эхлэн дагаж мөрдөнө/

4.1.3. хандив, тусламж.

4.2. Сангийн хөрөнгийг дээд боловсролын сургалтын байгууллагын суралцагчид олгох сургалтын төлбөрийн зээл, суралцагчийн тэтгэлэг, санхүүгийн дэмжлэг болон сангийн үйл ажиллагаатай холбоотой бусад зардлыг санхүүжүүлэхэд зарцуулна. ~~Сангийн үйл ажиллагааны зардал нь зээлийн хүүгийн өрлөгийн 2 хувиас илүүгүй байна. /Энэ заалтад ЗГ-ын 2018 оны 46-р тогтоолоор өөрчлөлт орсон бөгөөд үүнийг 2018-5-1-ний өдрөөс эхлэн дагаж мөрдөнө/~~

4.3. Сангийн хөрөнгийг хууль, энэ журамд зааснаас бусад үйл ажиллагаанд зарцуулахыг хориглоно.

Тав. Сангийн эрх, үүрэг

5.1. Сан дараах эрхтэй байна:

5.1.1. сургалтын төлбөрийн зээлийн болон амьжиргааны зардлын тэтгэлэг олгох гэрээ байгуулах, сургалтын төлбөрийн зээл, тэтгэлэг олгох;

5.1.2. сургалтын төлбөрийн зээл, суралцагчийн тэтгэлэг авч байгаа суралцагчийн сурлага, шилжилт хөдөлгөөний талаарх мэдээлэл болон зээл, тэтгэлгийн зарцуулалтын тайланг дээд боловсролын сургалтын байгууллагаас авах;

5.1.3. сангийн үйл ажиллагаатай холбоотой асуудлаар гадаад, дотоодын төрийн болон төрийн бус байгууллагатай хамтран ажиллах, төсөл хэрэгжүүлэх;

5.1.4. сургалтын төлбөрийн зээл, зээлийн гэрээний биелэлттэй холбоотой өрөлцөгч-банк-бөжөн дээд боловсролын сургалтын байгууллагуудын үйл ажиллагаанд хяналт тавих, шаардлагатай бол уг асуудлаар хуулийн байгууллагад хандах. /Энэ заалтад ЗГ-ын 2018 оны 46-р тогтоолоор өөрчлөлт орсон бөгөөд үүнийг 2018-5-1-ний өдрөөс эхлэн дагаж мөрдөнө/

5.2. Сан дараах үүрэгтэй байна:

5.2.1. сангийн хөрөнгийг зориулалтын дагуу зарцуулах;

5.2.2. сангийн тухайн жилийн төсвийг боловсруулах;

5.2.3. сургалтын төлбөрийн зээл олгох үйл ажиллагаатай холбогдуулж дээд боловсролын сургалтын байгууллагуудтай гэрээ байгуулах; /Энэ заалтад ЗГ-ын 2018 оны 46-р тогтоолоор өөрчлөлт орсон бөгөөд үүнийг 2018-5-1-ний өдрөөс эхлэн дагаж мөрдөнө/

5.2.4. сургалтын төлбөрийн зээлийг эргэн төлүүлэх ажлыг зохион байгуулах, зээлийн барьцаанд байгаа хөрөнгийн баталгаа бүрдүүлэх;

5.2.5. сургалтын төлбөрийн зээлийн гэрээг зөрчсөн тохиолдолд нэхэмжлэх гаргах;

5.2.6. сургалтын төлбөрийн зээлийг төлөхөөс зайлсхийсэн этгээдэд гэрээ болон хууль тогтоомжид заасан хариуцлага хүлээлгэх асуудлыг холбогдох байгууллагад тавьж шийдвэрлүүлэх;

5.2.7. сургалтын төлбөрийн зээл, тэтгэлэгт хамрагдах суралцагчдын бичиг баримтын бүрдүүлэлт, зээлийг эргэн төлүүлэх асуудлаар төрийн болон нутгийн захиргааны байгууллагатай хамтран ажиллах;

5.2.8. сангийн үйл ажиллагааны тайлан гаргах;

5.2.9. сангийн санхүүжилтээр дээд боловсролын сургалтын байгууллагад суралцагчдын талаар мэдээллийн сан бүрдүүлэх.

Зургаа. Бусад

6.1. Сан нь үйл ажиллагаандаа жил бүр хяналт-шинжилгээ, үнэлгээ хийлгэнэ.

6.2. Энэхүү журмыг зөрчсөн этгээдэд холбогдох хууль тогтоомжид заасны дагуу хариуцлага хүлээлгэнэ.

--oOo--

Засгийн газрын 2016 оны 111
дүгээр
тогтоолын 2 дугаар хавсралт

БОЛОВСРОЛЫН ЗЭЭЛИЙН САНГИЙН УДИРДАХ ЗӨВЛӨЛИЙН БҮРЭЛДЭХҮҮН

Дарга -Боловсрол, соёл, шинжлэх ухаан, спортын сайд

Дэд дарга -Боловсрол, соёл, шинжлэх ухаан, спортын
яамны Төрийн нарийн бичгийн дарга

Гишүүд: -Хөдөлмөр, нийгмийн хамгааллын яамны Төрийн
нарийн бичгийн дарга;

-Хууль зүй, дотоод хэргийн яамны Төрийн нарийн бичгийн дарга;

-Засгийн газрын Хэрэг эрхлэх газрын боловсролын асуудал хариуцсан референт;

-Боловсрол, соёл, шинжлэх ухаан, спортын яамны Боловсролын бодлогын газрын дарга;

-Боловсрол, соёл, шинжлэх ухаан, спортын яамны Санхүү, эдийн засгийн газрын дарга;

-Монголбанкны Мөнгөний бодлогын газрын Бодлогын хэрэгжилт, зээлийн хэлтсийн захирал (зөвшилцсөнөөр);

-Сангийн яамны Төсвийн зарлагын хэлтсийн дарга.

Нарийн бичгийн дарга -Боловсролын зээлийн сангийн гүйцэтгэх захирал.